

Izgradnja integriteta u odbrambenom sektoru

Ministarstvo odbrane Bosne i Hercegovine (u daljem tekstu: MO BiH) aktivano sudjeluje u inicijativi Sjevernoatlanskog saveza u vezi sa izgradnjom integriteta u odbrambenom i sigurnosnom sektoru (http://www.nato.int/cps/en/natohq/topics_68368.htm?) Ovaj program osigurava praktičnu pomoć državama učesnicama u jačanju integriteta, transparentnosti i odgovornosti te smanjuje rizike od korupcije. MO BiH je pojačalo nastojanja u jačanju integriteta i profesionalizma. Tako je ministarstvo, pored ostalog, pristupilo procesu samoprocjene izgradnje integriteta u odbrambenom sektoru te je izradilo i u NATO HQ Brisel dostavilo odgovor na standardizovani upitnik. U nastavku procesa, stručni tim NATO HQ iz Brisela boravio je u Bosni i Hercegovini i obavio je intervjue/razgovore sa ključnim osobljem MO BiH i OS BiH, kao i sa predstavnicima pojedinih institucija i agencija Bosne i Hercegovine, te nevladinih organizacija, u cilju nastavka sagledavanja stanja integriteta.

Rezultat zajedničkog jednogodišnjeg rada MO BiH i NATO HQ je izvještaj NATO o kolegijalnoj ocjeni pod nazivom „Building Integrity Selfassessment Peer Review Report – Bosnia and Herzegovina“ (Samoprocjena izgradnje integriteta – Izvještaj o kolegijalnoj ocjeni Bosne i Hercegovine) koji je Pomoćnik generalnog sekretara NATO za političke poslove i sigurnosnu politiku dostavio Ministru odbrane BiH. Izvještaj je identifikovao dobre strane i ponudio preporuke za poboljšanje stanja u oblasti izgradnje integriteta i prevencije korupcije u odbrambenom sektoru. U zaključku ocjene kaže se da MO BiH treba nastaviti saradnju sa NATO HQ iz Brisela i sa NATO štabom u Sarajevu u pogledu implementacije preporuka sadržanih u kolegijalnoj ocjeni.

Želimo informirati da je u toku provođenje „Akcionog plana za prevenciju korupcije i borbu protiv korupcije u MO BiH i OS BiH za 2014. godinu“, u koji su značajno ugrađeni nalazi sadržani u ocjeni NATO. Takođe, namjera je da se ovaj materijal ubuduće koristi, pored drugih relevantnih dokumenata, prilikom izrade plana integriteta MO BiH, a sama procjena će biti dostupna javnosti putem web stranice MO BiH.

Takođe, važno je istaći da je Zakon o odbrani Bosne i Hercegovine prepoznao značaj integriteta i identifikovao je Generalni inspektorat kao organizacijsku jedinicu ministarstva odbrane nadležnu za koordiniranje napora u implementaciji ovog koncepta. Posebnu pažnju posvetili smo jačanju svijesti i sistemskom odnosu prema izazovima. U tom smislu, MO BiH ima jasno artikulisanu politiku izgradnje integriteta, prevencije i borbe protiv korupcije kojom smo uspostavili opće zahtjeve i smjernice, definirali nadležnosti i utvrditi metode i načine implementacije.

Sarađujemo i sa državnom agencijom nadležnom za koordiniranje napora cjelokupnog društva u oblasti borbe protiv korupcije, ali i sa Zajedničkom komisijom za odbranu i sigurnost BiH, Parlamentarnim vojnim povjerenikom i agencijama za sprovođenje zakona.

Nastojimo dati svoj doprinos i u regionalnim okvirima sudjelujući u inicijativi izgradnje integriteta u Jugoistočnoj Evropi. NATO je i u ovoj oblasti važan partner za ministarstvo odbrane. Svoje sposobnosti u oblasti obuke smo ponudili domaćim i međunarodnim partnerima kroz NATO akreditovane kurseve u Centru za obuku za operacije podrške miru.

Svjesni smo da tamo gdje nedostaje integritet, profesionalizam i transparentnost nastaje prostor pogodan za korupciju. Svaka reforma društva trebala bi sadržavati procese koji će, pored ostalog, biti usmjereni na izgradnju integriteta pojedinaca i institucija, transparentnost procesa i odgovornost na svim nivoima vlasti i društva u cjelini. Na taj način će biti uvažene demokratske vrijednosti, vladavina zakona, poštivanje ljudskih prava, odgovorno upravljanje resursima i pravovremeno suprostavljanje devijantnom ponašanju koje vodi ka korupciji. Upravljanje odbranom je kompleksno kako u području ljudskih resursa, budžetiranja, odbrambenih nabavki, tako i u oblasti viškova naoružanja, municije, vojne opreme i infrastrukture, itd. Zbog toga koristimo sve raspoložive instrumente koji će doprinijeti napretku i u tom duhu MO BiH:

- Potpuno je posvećeno jačanju profesionalizma, izgradnji integriteta, jačanju odgovornosti i transparentnom upravljanju resursima odbrane,
- Nastaviće ispunjenje obaveza iz državne Strategije za borbu protiv korupcije,
- Svjesno značaja inicijative izgradnje integriteta, opredijeljeno je nastaviti saradnju sa NATO u ovoj oblasti,
- Potpuno podržava i aktivno sudjeluje u inicijativi izgradnje integriteta u Jugoistočnoj Evropi, čime još jedanput ističe značaj regionalne saradnje,
- Gradi vlastite kapacitete za obuku u oblasti izgradnje integriteta, na taj način jačajući svijest i dajući doprinos širem okruženju,
- Imajući u vidu izazove sa kojim se susreće i opredjeljenost za suprostavljanje devijantnom ponašanju, stvorilo je pretpostavke da svi građani koji žele prijaviti navodne nepravilnosti ili indicije korupcije u odbrambenom sektoru to mogu i učiniti na više načina, uključujući neposredni razgovor, telefon, pismo, e-mail, faks, elektronski kanal „etička linija“ i dr.